

佛說醫喻經

宋西天三藏朝奉大夫試光祿卿傳法大師施護奉詔譯

如是我聞一時世尊在舍衛國中與苾芻衆俱是時世尊告諸苾芻言汝等當知如世良醫知病識藥有於四種若具足者得名醫王何等爲四一者識知某病應用某藥二者知病所起隨起用藥三者已生諸病治令病出四者斷除病源令後不生是爲四種云何名爲識知某病應用某藥謂先識知如是病相以如是藥應可治療令得安樂云何名爲知病所起隨起用藥謂知其病或從風起或從痰起或從痰起或從癰起或從骨節起或積實所起知如是等病所起處隨用藥治令得安樂云何名爲已生諸病治令病出謂知其病應從眼出或於鼻中別別治療而出或煙

熏水灌鼻而出或從鼻竅引氣而出或吐瀉出或於偏身攻汗而出乃至身分上下隨應而出知如是等病可出處善用藥治令得安樂云何名爲斷除病源令後不生謂識知病源如是相狀應如是除當勤勇力現前作事而善除斷即使其病後永不生令得安樂如是等名爲四種知病識藥如來應供正等正覺亦復如是出現世間宣說四種無上法藥何等爲四謂苦聖諦集聖諦滅聖諦道聖諦如是四諦佛如實知爲衆生說而令斷除生法苦本生法斷故而老病死憂悲苦惱諸苦永滅如來應供正等正覺爲是利故宣說如是無上法藥令諸衆生得離諸苦諸苾芻又如轉輪聖王四兵具足故得如意自在如來應供正等正覺亦復如是佛說此經已諸苾

勿來歡喜信受

佛說醫喻經